

Կամաւորական խմբեր կազմակերպելով՝ Կովկասի հայ ղեկավար շրջանները նպատակ ունէին՝ մի կողմից մասնակցելով պատերազմին Թիւրքիայի դէմ՝ արագացնել Թիւրքահայերի ազատութիւնը, միւս կողմից՝ զինւած ուժեր ունենալով ռազմաճակատի առաջաւոր մասերում՝ նպաստել այնտեղի հայ ժողովրդի ինքնապաշտպանութեան գործին: Ենթադրւում էր, որ կամաւորական խմբերը արագ շարժումներով կարող էին առաջն առնել կամ մեղմացնել կոտորածները:

Իրականութեան մէջ, կամաւորական խմբերը խաղացին, գլխաւորապէս, զինւորական դեր և, այս տեսակէտից, անգնահատելի ծառայութիւն մատուցեցին ռուս բանակին: Նրանք ո՛չ միայն յառաջապահ-հետախուզական պաշտօններ էին կատարում, այլ և մասնակցում էին ընդհանուր ճակատամարտների կամ լուծում էին զինւորական ուրոյն խնդիրներ: Կովկասեան ռուս բանակի տարեգրութեան մէջ հայ կամաւորական խմբերն ունեն իրենց պատւաւոր տեղը թէ՛ կատարած հերոսական գործերով և թէ՛ տւած բազմութիւ ու թանգազին գոհերով: Բացի հարիւրաւոր պարզ մարտիկներից, պատերազմի դաշտում ընկան շատ քաջ ու ժողովրդական խմբապետներ, որոնց շարքին և Քեռին ու Խէչօն:\*) Խմբապետներից ու կամաւորներից շատերը վարձատրւեցին քաջութեան նշաններով: Մի ահազին թիւ հայ երիտասարդների խմբերի մէջ ձեռք բերեց զինւորական փորձառութիւն և յետագային, մանաւանդ, Հայաստանի անկախութեան շրջանում, մեծ չափով օգտակար եղաւ հայ ժողովրդի և հանրապետութեան պաշտպանութեան գործին:

Կամաւորական խմբերը, սակայն, մի կաթիլ էին համեմատած այն ահազին օժանդակութեան հետ, որ հայ ժողովուրդը բերեց Ռուսաստանին պատերազմի ընթացքին: Ըստ պաշտօնական հաշիւի, հայերի 13%-ը զինւոր էր զանազան ռազմաճակատներում: Ուրիշ խօսքով, 2 միլիոննոց ռուսահայութիւնը աւելի քան 250,000 զինւոր տւեց ռուս բանակին: Բացի այդ, նա իր ուժերը հասցրեց գերագոյն լարման և թիկունքում՝ մասնակցելով ռազմաճակատի օգնութեան յատկացւող բազմապիսի ձեռնարկների: Եւ այդ ամենը կատարւում էր մէկ նպատակով. Թիւրքահայկական դատի լուծման, Թիւրքահայաստանի ազատագրութեան համար:

Պատերազմի սկզբին հայկական շրջաններում տիրում էր ընդհանուր համոզում. մի քանի ամսւայ մէջ ռուսները կը գրաւեն Վանն ու Էրզրումը, և հայկական շրջանները կազատւեն Թիւրքական լծից: «Ինչի՞ս պէտք են կօշիկ ու մուշտակ, ասում էր Անդրանիկը պատերազմի սկզբին, զինւորին կուտամ չարոխ ու հալւա — և հինգ օրէն Վան եմ...»

Այս հաւատն էր, անշուշտ, պատճառ այն համազգային խանդավառութեան, որ առաջ բերեց կամաւորական շարժումը: Սակայն, օրեր ու ամիսներ անցան, և հայկական նահանգները մնացին չգրաւած: Աւելին

\*) Հայ կամաւորական շարժումը դեռ սպասում է իր պատմագրին: Նրա մասին ամփոփ գաղափար է տալիս գոր. Գ. Ղորղանեանի գիրքը՝ «La Participation des Arméniens à la Guerre Mondiale sur le Front du Caucase (1914—1918)», Paris, 1927, որ հրատարակեց մաւ հայերէն լեզուով «Հայրենիք» ամսագրի 1926—27թ. համարներում: